



Broj/Broj: 03/1-50-1-9-19/08  
Sarajevo/Sarajevo, 1. 4. 2008. godine

## **Z A P I S N I K**

### **19. sjednice Zajedničke komisije za odbranu i sigurnost BiH Parlamentarne skupštine BiH, održane 1.4.2008. , u vremenu od 10 do 14 sati**

Sjednici su prisustvovali članovi Zajedničke komisije: Branko Zrno, Slobodan Šaraba, Šefik Džaferović, Jozo Križanović, Dušanka Majkić, Mirko Okolić, Drago Kalabić, Adem Huskić, Vinko Zorić, Ivo Miro Jović i Hazim Rančić.

Opravdano je odsustvovao Sulejman Tihić.

Sjednici su prisustvovali i gosti, te predstavnici Sekretarijata Parlamentarne skupštine BiH:

- Igor Crnadak, zamjenik ministra odbrane BiH;
- Bakir Dautbašić, sekretar Ministarstva sigurnosti BiH;
- Lejla Dizdarević, Štab NATO-a u Sarajevu;
- Christian Haupt i Jasna Dragičević, Misija OSCE-a u BiH;
- Vesna Wills i Alma Ahmetbegović, EUPM;
- Dragica Hinić, sekretar Zajedničke komisije za odbranu i sigurnost BiH.

Sjednicom je predsjedavao Branko Zrno, predsjedavajući Zajedničke komisije za odbranu i sigurnost BiH.

Za sjednicu je predložen i jednoglasno prihvaćen sljedeći

### **DNEVNI RED**

1. Usvajanje zapisnika 14., 15. i 16. sjednice Zajedničke komisije;
2. Razmatranje Prijedloga zakona o izmjenama Zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu - druga komisijska faza (predlagač: Vijeće ministara BiH);
3. Razmatranje Informacije o trenutnom stanju sigurnosti u BiH (sačinilac: Ministarstvo sigurnosti BiH);
4. Informacija o stanju sigurnosti u BiH za 2007. godinu (sačinilac: Ministarstvo sigurnosti BiH);
5. Tekuća pitanja:
  - a. Informacija o posjeti članova Zajedničke komisije za odbranu i sigurnost BiH sjedištu Terenskog ureda Granične policije -Jug Čapljina;
  - b. Dopis Ad hoc komisije Predstavničkog doma u vezi s predstojećim izmjenama i dopunama Poslovnika Predstavničkog doma PSBiH;

- c. Prijedlozi i sugestije struktura odbrane i sigurnosti u vezi s Prijedlogom zakona o plaćama i nakanadama u institucijama BiH;
- d. Informacija švicarske vlade u vezi s prijedlogom radne posjete Zajedničke komisije ovoj zemlji;
- e. Poziv Skupštine Zapadnoevropske unije predsjedavajućem Zajedničke komisije za učešće na konferenciji o temi „Strategijski izazovi za evropsku sigurnost i odbranu“;
- f. Obavještenje o organizaciji seminara o organizaciji rada na sigurnosnim pitanjima u stranci i poslaničkom klubu, u organizaciji Konrad Adenauer fondacije i Misije OSCE-a u BiH.

#### **Ad. 1. Usvajanje zapisnika 14., 15. i 16. sjednice Zajedničke komisije**

Zapisnici 14., 15. i 16. sjednice usvojeni su jednoglasno.

#### **Ad.2. Razmatranje Prijedloga zakona o izmjenama Zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu - druga komisijska faza (predlagač: Vijeće ministara BiH)**

**Branko Zrno** ukratko je informirao da se Prijedlog zakona o učešću pripadnika Oružanih snaga BiH, policijskih službenika, državnih službenika i ostalih zaposlenika u operacijama podrške miru i drugim aktivnostima u inozemstvu razmatra ponovo s obzirom da Predstavnički dom nije usvojio negativan komisijski izvještaj o ovom zakonu. Naglasio je da je na Prijedlog zakona amandman ponovo uložio Slobodan Šaraba.

**Dužanka Majkić** izrazila je nezadovoljstvo vraćanjem ovog, ali i drugih zakona radi ponovne komisijske rasprave, smatrajući to nepotrebnim, jer će rezultat glasanja opet biti isti.

**Šefik Džaferović** istakao je da Predstavnički dom nije prihvatio negativan komisijski izvještaj i naglasio spremnost za prihvatanje teksta Zakona koji je predložilo Vijeće ministara BiH, ali ne i dostavljenog amandman na ovaj tekst.

**Mirko Okolić** istakao je da je amandman u raspravi o Zakonu odbijen, a poslije se glasalo o samom tekstu Zakona koji zato i nisu prihvatili predstavnici RS-a.

**Jozo Križanović** bio je mišljenja da bi bilo dobro čuti predstavnike Ministarstva odbrane BiH o tome šta je osnovni cilj predloženih zakonskih izmjena, te šta se suštinski mijenja ako se ovaj zakon ne prihvati.

**Igor Crnadak** istakao je da je predlagač Zakona Vijeće ministara BiH a ne Ministarstvo odbrane BiH. Naglasio je da se ovim izmjenama neke norme žele tehnički usaglasiti s drugim zakonskim aktima. Također, želja je bila stvoriti zakonski okvir i za učešće rezervista u mirovnim misijama, posebno u slučaju lica sa specijalističkom obukom. BiH je još daleko od toga da se nađe u takvoj situaciji jer nije završen ni set podzakonskih akata za te potrebe, kao što još uvijek nemamo ni iskazane potrebe za to. Zato nema trenutne štete u slučaju neprihvatanja ovog zakona jer nemamo ni uokviren rezervni sastav OS. U svakom slučaju, Ministarstvo odbrane BiH spremno je i dalje raditi na rješavanju navedenog pitanja.

#### Odlučivanje

Nakon rasprave, članovi Zajedničke komisije izjasnili su se o amandmanu Slobodana Šarabe, a potom i o Zakonu u cjelini.

Komisija, sa pet glasova „za“, dva glasa „protiv“ i dva „suzdržana“ glasa, uz postojanje proste većine glasova, ali neispunjavanje uslova kojim se zahtijeva da ta većina uključuje i po jedan glas predstavnika iz konstitutivnih naroda (u ovom slučaju glas predstavnika iz bošnjačkog naroda), nije prihvatila amandman Slobodana Šarabe.

Komisija potom, sa pet glasova „za“, tri „protiv“ i jednim „suzdržanim“ glasom, uz postojanje proste većine glasova, ali neispunjavanje uslova kojim se zahtijeva da ta većina uključuje i po jedan glas predstavnika iz konstitutivnih naroda (u ovom slučaju glas predstavnika iz srpskog naroda), nije prihvatila tekst Prijedloga zakona u cjelini.

Kako je Zakon ponovo odbijen, to je i obrazloženje razloga odbijanja isto.

**Ad.3. i 4. Razmatranje Informacije o trenutnom stanju sigurnosti u BiH i Informacije o stanju sigurnosti u BiH za 2007. godinu (sačinilac: Ministarstvo sigurnosti BiH)**

Nakon kraćih diskusija članovi Zajedničke komisije odlučili su da zajedno razmatraju obje informacije s obzirom da se radi o istoj oblasti.

**Bakir Dautbašić** naglasio je da Informacija o trenutnom stanju sigurnosti sadrži informacije iz 2008. godine, a cjelovita Informacija sadrži podatke za cijelu 2007. godinu. Obje informacije usvojilo je Vijeće ministara BiH, a dat je i poseban osvrt na maloljetničku delinkvenciju.

**Mirko Okolić** istakao je da su ove informacije odraz nezadovoljavajućeg stanja u društvu. Potom se osvrnuo na pojedine stavke u Informaciji o trenutnom stanju sigurnosti, kao što je data kvalifikacija u vezi s ratnim zločincima u prvoj rečenici na prvoj strani teksta koja je ozbiljna, da su poznate kriminalne grupe a nema efekata u njihovom hvatanju i onemogućavanju djelovanja i sl. Posebno ga iritira pitanje reketiranja. Naglasio je propuste i načine njihovog rješavanja koje bi ova informacija trebalo da sadržava. Tako, npr., ističe tranzitne probleme i šta ugrožava sigurnost u BiH u vezi s tim problemima (tranzit ljudi, droge). U Informaciji se dalje ne pominje održani skup u Zenici, ne pominje se pljačka novca u Kargo centru, niti ima dovoljno informacija o počinjenim krivičnim djelima silovanja. U odnosu na Informaciju za 2007. godinu, naveo je da je smanjen procenat rasvijetljenosti djela oružane pljačke, što je alarmantno. Također, Zakon o oružju i municiji treba biti što prije donesen. Posebno pitanje vezano je za maloljetne prijestupnike, za koje ne postoji adekvatna ustanova za resocijalizaciju, iako imamo više praznih objekata. Osvrnuo se i na problem mina, pitanje zdrave hrane, povratnika u činjenju krivičnih djela i sl. Posebno je potencirao pitanje određivanja radnog vremena u ugostiteljskim objektima koje bi trebalo urediti na nivou BiH upoređujući to sa iskustvima zemalja EU. Zato bi ovu informaciju trebalo primiti k znanju, te predložiti zaključak da Ministarstvo sigurnosti BiH do sjednice Predstavničkog doma dostavi prijedloge mjera i zaključaka za rješavanje navedenih problema.

**Slobodan Šaraba je**, upoređujući ove informacije s prethodnom Informacijom za 2006. godinu, istakao da je situacija lošija nego u prethodnom periodu. Govoreći s pozicije nekoga ko živi u Hercegovini, naglasio je da je u posljednja tri mjeseca registrirano preko 120 krađa vozila, da je bilo miniranja vozila, bacanja bombi, a da pri tome o ovim slučajevima nema ništa u datim informacijama. Mišljenja je da Informacija o trenutnom stanju sigurnosti nije trebalo da počne pitanjem kosovskog problema, niti na kraju pitanjem ispoljavanja netrepeljivosti putem SMS poruka. Konsatacija na prvoj strani o neprocesuiranju lica osumnjičenih za ratne zločine također nije tačna, jer je kao član Ustavnopravne komisije infomiran da Tužilaštvo na tom polju radi u dvije smjene. Informacija u svakom slučaju treba biti daleko kvalitetnija. Izrazio je potom žaljenje što usvojeni zaključci uz Informaciju o stanju sigurnosti za 2007. godinu nisu realizirani. U vezi s tim predložio je određene konkretne zaključke koji se odnose na: potrebu preduzimanja mjera za formiranje ustanova za resocijalizaciju maloljetnih delinkvenata, potrebu što hitnijeg otklanjanja slabosti u zakonodavstvu uz određivanje nosilaca te aktivnosti, te potrebu za zaprečavanje puteva, posebno u istočnom dijelu BiH, jer ovi putevi omogućavaju izvršenje krivičnih djela kao što su krađe vozila, trovina drogom i sl.

**Jozo Križanović je**, podsjećajući na raspravu o prethodnoj informaciji za 2006. godinu, istakao da je od Ministarstva sigurnosti BiH zatraženo da primijeni novu metodologiju pri izvještavanju, te su im date i određene smjernice. Čitajući dostavljene informacije, stiče se utisak da je objedinjena masa podataka, a bez navođenja glavnih faktora koji ugrožavaju sigurnost, te bez navođenja prioriteta. Iz ovakvih informacija svako može izvući drugačije zaključke. U informacijama ne postoji naznaka šta bi se u budućnosti trebalo prioritarno preduzeti kako bi se navedeno stanje popravilo, što je osnovni nedostatak, te kako Parlamentarna skupština BiH treba reagirati.

**Šefik Džaferović** istakao je da je Informacija o trenutnom stanju sigurnosti dostavljena na zahtjev Parlamentarne skupštine BiH, dok je druga informacija redovna godišnja. Potom se osvrnuo na diskusiju Okolića koja se odnosi na lica koja su počinila ratne zločine. Mišljenja je da zločin nema ime i prezime, već isključivo poznaje zločinca i žrtvu. Zločinci se trebaju i moraju pronaći i u tom dijelu ne možemo uvoditi narode i balanse. Potom je naveo da je nemoguće sačiniti informaciju o

trenutnom stanju sigurnosti koja će sve zadovoljiti, te zato dostavljenu informaciju treba proslijediti Parlamentarnoj skupštini BiH na razmatranje.

**Mirko Okolić je**, u vezi s prethodnim komentarom Šefika Džaferovića o ratnim zločincima, naveo da on nije komentirao to pitanje na takav način i u tom smislu. Svi ratni zločinci treba da budu procesuirani, s naglaskom na riječ „svi“, bez obzira koje su nacionalnosti.

**Dužanka Majkić je**, osvrćući se na obje informacije, dala određene primjedbe. Istakla je posebno probleme iz tačke 7. koji se odnose na uklanjanje mina. Istakla je da je u minskim poljima stradalo šest lica i da je javnost uznemirena, te da je pod minama još uvijek veliki broj naseljenih i drugih površina. Zbog nedostatka potrebnih sredstava, čišćenje ovih površina trebalo bi se vršiti u dugogodišnjem vremenskom periodu, posebno što je u međuvremenu opao i interes donatora za ovu aktivnost. Izrada zakona o protuminskoj akciji već dvije godine stoji, nema ni riječi o radu Komisije za deminiranje, čiji mandat je davno istekao. Ova komisija nikako se ne sastaje a koristi niz prinadležnosti, te na tom polju treba nešto preduzeti. Po Sporazumu o sukcesiji, država dobiva 20% sredstava, koja bi se mogla usmjeriti i u Fond za deminiranje. Zato je predložila održavanje hitnog sastanka s resornim ministrom i zamjenikom, te direktorom i šefovima BHMAC-a, radi rasprave o ovoj temi obrađenoj dijelom u informacijama. Dalje se osvrnula na probleme koji se odnose na sigurnost u saobraćaju. Informacije ne dotiču nijednim dijelom Zakon o osnovama sigurnosti saobraćaja, koji još nije proveden.

**Ivo Miro Jović** naveo je da nema suštinskih primjedbi na dostavljene akte, s napomenom da bi bilo dobro da su njima navedeni prijedlozi mjera za prevazilaženje konstatiranog stanja. Potom je naveo neke od uočenih propusta. Prilikom konstatiranja teškog ratnog naslijeđa na strani 1., Ministarstvo sigurnosti BiH ne može govoriti „oko 10.000 lica“, već morati navesti tačan podatak, jer je iz Tužilaštva BiH dobio podatak da je 16.000 lica procesuirano. Nije saglasan ni s konstatacijom da nema terorističkih prijetnji i djela jer postoje elementi koji govore suprotno. Nezadovoljan je nepreciznošću datih informacija. Tako u vezi s ubistvom lica u tramvaju, treba navesti je da je u tom djelu učestvovao samo jedan maloljetnik i da je žrtva dječak. Očito je da nije primijenjena odgovarajuća metodologija pri izradi informacija, te bi ove informacije trebali primiti k znanju, a zatražiti sveobuhvatan materijal izrađen po novoj metodologiji.

**Branko Zrno** istakao je da je Zajednička komisija na 5. sjednici, prilikom rasprave o Informaciji o stanju sigurnosti u BiH za 2006. godinu, usvojila određene zaključke, koje su potvrdili i domovi. Ovi zaključci odnosili su se na primjenu metodologije prilikom izrade nove informacije, a kao osnova za to trebalo bi da posluži Sigurnosna politika BiH, trebalo je sačiniti listu sigurnosnih prioriteta s prijedlogom mjera za njihovo rješavanje, zatim obraditi pitanje korupcije i pitanja iz oblasti saobraćaja, prometa opojnih droga, transporta novca i sl. U dostavljenim informacijama nedostaje procjena situacije za određene slučajeve. Mišljenja je da se o dostavljenim informacijama treba da budu upoznati domovi, te ih stoga Komisija treba primiti k znanju i uputiti u daljnju proceduru. Također, trebali bi usvojiti i neke zaključke koji su predlagani tokom rasprave.

**Adem Huskić** predložio je da Komisija ponovo usvoji zaključke koje je usvojila i prilikom razmatranja Informacije za 2006. godinu, s obzirom da ih Ministarstvo sigurnosti BiH nije realiziralo BiH. Treba, prije svega, utvrditi listu sigurnosnih prioriteta. Konkretno u Informaciji o trenutnom stanju sigurnosti rečeno je da je policija u Kantonu Sarajevo od 9.2.2008. pojačala rad, te da od tada nije bilo incidenata. Zanimalo ga je da li je taj pojačan rad doveo do smanjenja incidenata, te da li do tada policija nije dobro radila. Predložio je da Komisija usvoji zaključak kojim od Ministarstva sigurnosti BiH zahtijeva da sačini procjenu osposobljenosti agencija za provođenje zakona da se nose sa sigurnosnim izazovima.

**Drago Kalabić** osvrnuo se na dio Informacije o trenutnom stanju sigurnosti koji se odnosi na rad stranih obavještajnih službi, uz primjedbu da je ministar trebalo da prisustvuje ovoj sjednici. Ova informacija trebalo je da bude bolje i profesionalnije pripremljena jer neki dijelovi koji se odnose na procjene stvaraju dileme. Tako, npr., zanima ga ko ruši ustavni poredak, jer su takve konstatacije opasne i mogu biti različito tumačene. Potom ga je zanimala akcija MUP-a FBiH u vezi s terorističkim aktivnostima, pri čemu nema učešća SIPA-e.

**Vinko Zorić** ponovio je primjedbu koju je imao i na prethodne informacije o stanju sigurnosti, a kojom se ukazuje na činjenicu da nije navedeno nijedno ime izvršioca krivičnih djela, za razliku od imena žrtava, za što Ministarstvo sigurnosti BiH očito nema hrabrosti. Ubice, dilere drogom i druge izvršioce krivičnih djela treba javno imenovati. Dalje je naveo da je povećan broj krivičnih djela

pljački a smanjen stepen otkrivanja njihovih počinilaca, pri čemu je ovo ne samo međunarodni problem već prije svega naš problem. Posebno se osvrnuo na krivična djela otuđenja vozila. Po njegovom saznanju, licima koja kupe novo vozilo, a po prestanku plaćanja kasko osiguranja, vrlo često vozila budu ukradena. Zanima ga da li je bilo ko od nadležnih istražnih organa ispitivao zaposlene u osiguravajućim društvima u takvim slučajevima. O ovakvim krivičnim djelima u dostavljenim informacijama nema ni riječi. Dalje ga je zanimala situacija gdje su uhvaćene tri kriminalne organizirane grupe. Te grupe vjerovatno znaju i za sve ostale koje djeluju u BiH i, po njegovom mišljenju, treba ih na neki način ispitati i natjerati da daju informacije o ostalim grupama. Inače, u dostavljenim informacijama smeta mu davanje mnogo statističkih podataka, jer one u suštini treba da prikažu opće stanje sigurnosti.

**Šefik Džaferović** iskazao je zadovoljstvo načinom rasprave o dostavljenim informacijama jer je posvećena sigurnosnim problemima i izazovima u BiH, na koje i Zajednička komisija na neki način treba dati odgovore. Mišljenja je da na ovoj sjednici informacije treba da budu primljene k znanju i dostavljene Parlamentarnoj skupštini BiH radi rasprave, a potom vraćene na razmatranje Zajedničkoj komisiji kako bi zajedno s Ministarstvom sigurnosti BiH utvrdila gdje su konkretni problemi i propusti u sistemu, kako bi se moglo djelovati u pravcu njihovog rješavanja. Tako npr. krivično zakonodavstvo neuračunljivim ubicama omogućava slobodu kretanja jer je nadzor nad takvim licima dat centrima za socijalni rad. Stoga je neophodna i radi se izmjena zakonodavstva u takvim i drugim sličnim slučajevima.

**Jozo Križanović** mišljenja je da je Komisija svoj rad fokusirala više na praćenje odbrambenih nego sigurnosnih struktura. Parlament pri tome jednom godišnje razmatra stanje sigurnosti u zemlji, a sada nam je faktički putem navedenih informacija dostavljen isključivo zbir statističkih podataka. Preko ovih pitanja ne treba olako preći, već treba probleme suštinski razmotriti, definirati ključne probleme, te Parlamentu predložiti mjere koje treba preduzeti za njihovo rješavanje. Ukoliko nema konkretnih prijedloga zaključaka na ovoj sjednici, navedene akte trebalo bi vratiti predlagaču radi dopuna u navedenom smlislu ili zatažati od Predstavničkog doma dodatno vrijeme kako bi se obavili razgovori s predstavnicima Ministarstva sigurnosti BiH koji bi išli u navedenom pravcu.

**Hazim Rančić** mišljenja je da Komisija treba predložiti određene zaključke kako bi se olakšala diskusija pred Parlamentom. Izrazio je i nezadovoljstvo što ministar sigurnosti BiH gotovo nikada ne prisustvuje sjednicama Zakjedničke komisije, posebno kada se raspravlja o ovako bitnim pitanjima.

**Mirko Okolić** predložio je da Komisija ponovo usvoji ranije usvojene zaključke, te da se sagleda mogućnost organiziranja rasprave o sigurnosnim pitanjima sa svim institucijama i agencijama koje se bave ovim problemima u BiH.

**Branko Zrno** istakao je da se može organizirati tematska sjednica o ovom pitanju. Potom je, sublimirajući raspravu i zaključke predložene tokom rasprave, formulirao prijedloge zaključaka koje bi Komisija uputila domovima Parlamentarne skupštine BiH na usvajanje. Predložio je da domovi ponovo usvoje zaključke koji su usvojeni prilikom razmatranja Informacije o stanju sigurnosti u BiH za 2006., kao i nove **zaključke**, kako slijedi:

1. Prilikom izrade narednih informacija o stanju sigurnosti u BiH, Ministarstvo sigurnosti BiH treba primijeniti novu metodologiju izrade, čije osnovne sadržajne elemente definira, prije svega, Sigurnosna politika BiH, pri čemu informacija treba biti jasna i rađena jedinstvenom komparativnom metodom.
2. Prilikom izrade naredne informacije Ministarstvo sigurnosti BiH treba utvrditi listu sigurnosnih prioriteta u BiH, te sačiniti prijedlog njihovog rješavanja za određeni vremenski period, kako bi Parlamentarna skupština BiH mogla kontrolirati proces njihovog rješavanja. Zajednička komisija za odbranu i sigurnost BiH i PSBiH pružit će potrebnu podršku Ministarstvu sigurnosti BiH prilikom sačinjavanja kompletne informacije u dijelu koji se odnosi na potrebu intenziviranja saradnje svih institucija BiH i subjekata koji treba da učestvuju u njenoj izradi;
3. Prilikom izrade naredne informacije, Ministarstvo sigurnosti BiH treba detaljno obraditi i pitanje korupcije u BiH, te dati prijedlog mjera za borbu protiv takvog djelovanja;
4. Radi stvaranja boljih uslova za rad agencija za provođenje zakona u BiH, a time i boljeg sigurnosnog okruženja, treba razmotriti raspoložive mogućnosti za njihov smještaj u

- neperspektivne vojne objekte, te insistirati na što kraćem roku reguliranja pitanja prijenosa vlasništva nad njima;
5. Donošenje Strategije za borbu protiv neovlaštene proizvodnje i stavljanja u promet opojnih droga, te posjedovanje i omogućavanje uživanja opojnih droga treba biti prioritetan zadatak, te se naći na prvom mjestu u Informaciji;
  6. Neophodno je da Vijeće ministara BiH što prije u parlamentarnu proceduru dostavi zakonske propise na nivou BiH o transportu i osiguranju većih količina novca i vrijednosnih papira. Također, potrebno je otkloniti uočene slabosti u zakonskim propisima iz oblasti sigurnosti uopće, kako bi se postojeće stanje popravilo;
  7. Zajednička komisija obavezuje se da organizira poseban sastanak s ministrom sigurnosti BiH i njegovim zamjenikom, te direktorima sigurnosnih agencija BiH, uključujući i direktora BHMACH-a, radi sagledavanja problematike navedene u Informaciji o stanju sigurnosti i predlaganja određenih mjera za njeno prevazilaženje.

Nakon rasprave, članovi Zajedničke komisije primili su k znanju obje informacije o stanju sigurnosti, jednoglasno usvojili zaključke koje je formulirao Branko Zrno, te mišljenje o Informaciji o trenutnom stanju sigurnosti u BiH odlučili prosljediti samo Predstavničkom domu, s obzirom da je samo ovaj dom i zatražio informiranje takve vrste.

#### **Ad.5. Tekuća pitanja:**

##### **a) Informacija o posjeti članova Zajedničke komisije za odbranu i sigurnost BiH sjedištu Terenskog ureda GP-Jug Čapljina**

Članovi Zajedničke komisije bez primjedbi primili su k znanju Informaciju o posjeti sjedištu Terenskog ureda GP-Jug Čapljina.

##### **b) Dopis Ad hoc komisije Predstavničkog doma u vezi s predstojećim izmjenama i dopunama Poslovnika Predstavničkog doma PSBiH**

Članovi Zajedničke komisije istakli su, bez posebnih komentara, svoju podršku izmjenama poslovnika oba doma.

##### **c) Prijedlozi i sugestije struktura odbrane i sigurnosti u vezi s Prijedlogom zakona o plaćama i nakanadama u institucijama BiH**

Članovi Zajedničke komisije upoznati su s dopisima zaposlenih u strukturama odbrane i sigurnosti u vezi sa Zakonom o plaćama i nakanadama, te istakli da je za ovu oblast nadležna druga komisija. O ovim pitanjima inače oni mogu učestvovati u raspravi kao članovi Parlamentarne skupštine BiH.

##### **d) Informacija švicarske vlade u vezi s prijedlogom radne posjete Zajedničke komisije ovoj zemlji**

Dragica Hinić informirala je prisutne da je Vlada Švicarske obavijestila Zajedničku komisiju da je spremna organizirati sastanke u vremenu od 19. do 22.5.2008., ali bez mogućnosti plaćanja troškova u ovoj zemlji. Služba će zato pokušati još jednom pronaći međunarodne organizacije, poput npr. DCAF-a, koje bi eventualno snosile troškove ove posjete.

Vinko Zorić izrazio je nezadovoljstvo činjenicom da Zajednička komisija realizira svoje međunarodne aktivnosti samo onda kada ima donatora za njihovu realizaciju. Stoga dosadašnju praksu treba mijenjati.

Branko Zrno saglasan je s navedenim konstatacijama, s tim da će promjenom finansiranja biti potrebno mijenjati i broj članova Komisije koji će učestvovati u međunarodnim aktivnostima.

Informacija je potom primljena k znanju.

**e) Poziv Skupštine Zapadnoevropske unije predsjedavajućem Zajedničke komisije za učešće na konferenciji o temi „Strategijski izazovi za evropsku sigurnost i odbranu, Pariz**

Branko Zrno istakao je da je dobio poziv za prisustvo na konferenciji o temi "Strategijski izazovi za evropsku sigurnost i odbranu", koja se održava u Parizu. Kako bi PSBiH trebalo da snosi sve troškove njegovog učešća, rekao je da ne očekuje posebne efekte prisustva na konferenciji te naglasio da nije zainteresiran za ovu aktivnost.

**f) Obavještenje o organizaciji seminara o organizaciji rada na sigurnosnim pitanjima u stranci i poslaničkom klubu, u organizaciji Konrad Adenauer fondacije i Misije OSCE-a u BiH**

**Christian Haupt** informirao je prisutne o seminaru vezanom za organizaciju rada na sigurnosnim pitanjima u stranci i poslaničkom klubu, a koji će zajedno organizirati Konrad Adenauer fondacija i Misija OSCE-a u BiH, 12.6.2008.

Nakon kraće diskusije, članovi Zajedničke komisije izrazili su zainteresiranost za ovu aktivnost, te primili k znanju ovu informaciju.

Zapisnik sačinila  
**Dragica Hinić**

Predsjedavajući  
Zajedničke komisije  
**Branko Zrno**